



Inatsisartut suleriaasianni § 33 naapertorlugu matumuuna aalajangiiffigisassaattut siunnersuut imaattoq saqqummiussissaanga:

Kalaallit Nunaanni napparsimasunut katsorsarneqarsinnaanngitsunut paaqutaqarfimmik (hospice) pisariaqartitsisoqarneranik Naalakkersuisut misissueqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaqaq Doris Jakobsen, Siumut)

Tunngavilersuut:

Danmarkimi ukiut qulikkuutaani kingullerni napparsimasunut katsorsarneqarsinnaanngitsunut paaqutaqarfimmik "hospice"-inik arlalinnik pilersitsisoqarnikuuvoq, taamatut napparsimasunik paaqutarinninnissamik isumaginnissinnaasunik, napparsimaviit taamaattut Danmarkimi 17-it ingerlanneqarput. Napparsimaviit paaqutaqarfiit naliginnaasumik 12-inik siniffeqartarput, ukiumut uninngasut 225-it missaani amerlassullit ullut 17-30 akornanni uninngasarput.

Napparsimaviit paaqutaqarfiusut sammisaat pingaarneq tassaavoq, toqujartortut sapinngisamik annernanngitsumik aammalu ataqinartumik inuerminnik naammassinninnissaat. Ilutigitillugu napparsimaviit taamaattut sammisaat tassaavoq qanigisaasut piffissami oqimaatsumi ikiorneqarnissaat. Tamakkua suliasaat napparsimavinnut naliginnaasunut naammassissallugit ajornakusoortuupput, tassalu paasisimasaqarneq aallaavigalugu peqqissaaneq.

Hospiceforum Danmark nalunaarusiaata paasinarsisippaa, Nuummi hospice-imik tassa paaqutaqarfimmik pisariaqartitsisoqartoq, tassangaanniik ilinniartitsinerit aammalu ikiuinerit nunatta sinneranut ingerlateqqinneqarsinnaallutik.

Pisortanut aningaasaqarnikkut allaffissornikkullu sunniutissat:

Siunnersuut piviusunngortinneqassappat Namminersorlutik Oqartussanut allaffissornikkut aningaasartuutunik nassataqassaaq, tassami misissuinissaq suliarineqassammat. Ataatsimut isigalugu AC-itut atorfik ukiumut ¼ miss. atorneqassasoq naatsorsuutigineqarpoq, qulaajaanerup nutserneqarnissaa il.il. Aningaasartuutissat allaffissornikkut aningaasaliissutip iluani sallinneqartariaqassapput. Tamannalu suliniutinut allanut tulleriissaarnermi kingullinngortitsisoqarsinnaaneranik kinguneqarsinnaavoq.

Napparsimasunik paaqutaqarfimmik aqqarneq marlunnik inissalimmik pilersitsinissaq 50 mio. koruuninik akineqarnissaa nalilerneqarpoq.

Inuiaqatigiinnut sunniutissat:

Siunnersuutip inuiaqatigiinnut sunniuteqarnissaa naatsorsuutigineqanngilaq, siunnersuut pisariaqartitsisoqarneranik misissuisoqarnissaannik imaqarmat.